

DOMINGU XXIX TEMPU KOMÚN – TINAN B

TEMA DOMINGU DA-29 TEMPU KOMÚN NIAN

Liturjia Domingu da-29 fó hanoin mai ita, dala ida tan, katak Maromak nia lójika lahanesan mundu nia lójika. Nia konvida ita atu heba'i ita-nia projetu pesoál sira podér no grandeza nian no halo sai ita-nian vida ida servisu nian ba maun-alin sira. Iha domin no saran-an hodi serví iha haraik-an ba maluk sira maka Maromak oferese ba ema sira moris rohan-laek no loos.

Leitura dahuluk apresenta mai ita “Maromak nia atan”, ema hakribi no despreza nia, maibé liuhusi nia maka Maromak nia moris no maksoin hatudu sai. *Leitura* ne'e fó hanoin mai ita katak ba Maromak vida ida moris iha simplisidade, haraik-an, sakrifísiu, entrega no saran-an nian, la'ós moris ida malisan nian, lalakon nian, frakasu nian; maibé vida ida fekunda no realiza ho modu nakonu, lori libertasaun no esperansa ba mundu no ema sira.

Iha *Evanjellu*, Jezús konvida eskolante sira atu mehi ambisaun nian, grandeza nian, podér nian no domínio nian manipula sira, maibé halo sira-nia moris don ida domin no servisu nian. Sira simu bolun atu tuir Mane-Maksoin “ne'ebé mai atu serví no haraik moris”, nune'e eskolante sira tenke fó sasin kona-ba orden foun ida no propoin, ho ezemplu, mundu ida livre husi podér ne'ebé hahata (halo sai atan).

Iha *leitura daruak*, autór Surat ba Ebreu sira ko'alia mai ita kona-ba Maromak ida ne'ebé hadomi ema laho limite no, tanba ne'e, dispostu atu asume ema sira nia frajilidade, tun ba sira-nia nivel, partilla ninia kondisaun. Nia la subar An iha nia podér no omnipoténsia nia kotuk, maibé aseita atu tun hodi ba hasoru ema sira no oferese ba sira Ninia domin.

LEITURA I – Is 53,10-11

MENSAJEN

Parte dahuluk ita-nia testu nian (vers. 2-3) apresenta mai ita “Jahwéh nia atan”. La dehan nia sé, nia aman-inan sé, nia rain ne'ebé loos. Figura anónima / naran-laek ida, deskoñesida, insignifikante tuir kritériu umanu. Hodi foti ilas ai-horis nian, profeta kompara nia nu'udar abut ida moris iha ra-fuik maran, marka ho ambiente maran ida-ne'e, laho faturak no laho karakterístika sira ne'ebé bele dada ema nia atensaun (vers. 2). Nia maka figura ida ema sira despreza, sira haree ninia terus nu'udar kastigu ida Maromak nian no taka sira nia oin bainhira haree nia atu labele hetan kontájiu (vers. 3). Iha tempu ida ne'ebé ema haree terus hanesan kastigu ida, “Atan” ne'e nia taterus sai hanesan Maromak nia kastigu boot. Tuir ema nia kritériu nia la hetan susesu, Maromak no ema sira despreza nia. Konserteza ema sei la konta nia iha ema boot sira nia leet, sira ne'ebé manán no iha papél boot iha mundu no istória nia hariin. Iha Maromak nia lójika, “Atan” ne'e nia moris la'ós ezisténcia insignifikante, derrota nian, laho sentidu... Nia sofrimentu la'ós kastigu ida Maromak nian tanba nia salan pesoál sira, maibé sakrifísiu ida reparasaun nian ne'ebé justifika ema barak nia salan sira. Liafuan “reparasaun” ne'ebé Deutero-Isaías uza maka liafuan kultu nian. Nia refere ba rituál sakrifísiu fiar-na'in antigu testamentu nian ne'ebé oferese balada ida nu'udar sakrifísiu atu hetan perdaun ba nia salan sira. Hodi hateten katak “Atan” nia sakrifísiu maka reparasaun ida, profeta hakarak dehan katak sofrimentu la'ós, nein kastigu ida, nein buat ida folin-laek, maibé serve atu elimina salan no atu fó moris foun ba comunidade Maromak nia Povu nian (ema barak ne'ebé testu ko'alia). Hodi haraik bengan ba ninia “Atan”, hodi fó “jerasaun

ne'ebé dura ba nafatin", "moris naruk" (vers. 10) no possibilidade atu "haree naroman" (vers. 11),

Maromak garante "Atan" nia lialoos no autenticidade moris nian.

Sarani dahuluk sira, nakonu ho impresaun kona-ba testu ne'e nia fafurak no ninia profundidade, uza beibeik nia atu komprende Jezús nia figura, "ne'ebé mate ba nia povu nia salvasaun". Iha Jezús mak "Atan Jahwéh" nia figura hetan signifikadu nakonu.

SALMU RESPONSORIAL – Salmu 32 (33).

LEITURA II – Heb 4,14-16

MENSAJEN

Jezús mak amlulik-boot ne'ebé "hakat liu lalehan" atu haraik laran-sadia ba fiar-na'in hotu (vers. 14). Espresaun "hakat liu lalehan" refere ba realidade inkarnasaun nian: Jezús, Maromak nia Oan-Mane, mai hasoru ema sira nu'udar amlulik-boot, atu halakon salan ne'ebé hanetik komuñau entre ema no Maromak no lori ema sira ba hasoru Maromak. Bele haree iha-ne'e Maromak nia esforsu, liuhusi nia Oan-Mane, atu harii filafali komunidadade vida nian ho ema sira no lori sira ba moris rohan-laek no loos nian.

Hasoru Maromak nia asaun boot ne'ebé mai husi nia domin ba ema sira, fiar-na'in sira tenke hatán ho fiar – katak ho aseitasaun inkondisionál ba Jezús nia proposta ("mai ita rai metin fiar ne'ebé ita haklaken"). Adere ba Jezús nia proposta signifika tama iha komuñau ho Maromak, tama iha Maromak nia família, simu moris naresin husi Nia.

Maski nia Maromak nia Oan. Jezús, amlulik-boot, komprende ema sira nia drama iha nia funu loroloron nian, iha sira-nia frajilidade hasoru persegisaun, iha sira-nia difikuldade atu manán konfortu ho egoízmua akomodasaun, babaruk, monotonia... Nia rasik hakruuk ba prova sira-ne'e, koñese tentasaun nia tatatak hanesan ita, koko difikuldade hanesan mós ho ita. Biar nunee, nia mantein fiél ba Maromak no nia proposta sira, hodi hatudu katak ita mós bele moris iha fidelidade ba Maromak (vers. 15).

Ita tuir-na'in sira Jezús nian, la mesak iha situasaun dezesperada, maski ho ita-nia salan no inkoerénsia sira. Ita bele no tenke aseita Jezús nia proposta no hateke ba Maromak, ho serteza katak Nia sei simu ita nu'udar oan doben liu. Tanba Jezús maka estabelese komuñau entre ita no ho Maromak, lori ita ba hasoru Maromak ne'ebé garante ninia laran-sadia, oras-ne'e ita moris situasaun foun grasa no liberdade nian. Ita bele, hakbesik an ho hakmatek no konfiansa, ba "kadunan grasa nian" husi ne'ebé suli moris rohan-laek no loos. Serteza ida-ne'e tenke tulun ita no fó esperansa mai ita iha momentu dramátiku sira ita-nia dalan nian iha istória (vers. 16).

ALELUIA – Mc 10,45

EVANJELLU – Mc 10,35-45

MENSAJEN

Parte dahuluk testu nian (vers. 35-40), apresenta Tiago no João nia pretensaun / hakaran, atu tur iha Reinu, ida iha Jezús nia sorin kuana no ida iha sorin karuk. Sira husu buat ne'e lahé

respeitu; maibé bele haree hanesan direitu loos ida, priviléjiu ida ne'ebé sira merese duni. Tiago no João imajina Reinu ida ne'ebé Jezús mai propoin tuir Dn 7,13-14 no hakarak asegura lalais fatin onra nian iha Jezús nia sorin, iha Reinu kbiit-na'in no glória nian. Faktu ne'e hatudu katak Tiago no João, maski simu katekeze hotu iha dala ba Jeruzalém, seidauk komprende buat ida kona-ba Reinu nia lójika no sei kontinua reflète no sente tuir lójika mundu nian. Ba sira importante maka sira-nia mehi pesoál nia realizasaun kona-ba autoridade, podér, no sai ema boot nian.

Dala ida tan Jezús tenke klarifika. Uluknanai, nia fó hatene ba eskolante sira katak atu tur iha meza Reinu nian, sira tenke dispostu atu "hemu husi kálise" ne'ebé Nia atu hemu no simu batizmu ne'ebé nia atu simu. "Kálise", iha kontestu bíbliku hatudu ema ida nia destinú; "hemu husi kálise ida", kálise Jezús nian, signifika partisipa iha Ninia destinú saran Nia moris nian ne'ebé Nia atu kumpre daudaun. Simu "batizmu hanesan" fó hanoin partisipasaun no tama iha Jezús nia paixaun no mate (kf. Rom 6,3-4; Col 2,12). Atu halo parte iha comunidade Reinu nian, eskolante sira presiza pruntu atu la'ó ho Jezús, dalan taterus nian, saran-an nian, to'ó mate. Maski Tiago no João hateten ho sinseridade katak sira pruntu atu la'ó ho Jezús, Nia la garante resposta positiva ba sira-nia pretensaun... Jezús evita liga hahalok kumpre misaun ho rekompensa, basá eskolante ida la bele tuir projetu ida ho kálkulu ka interese; iha lójika Reinu nian, eskolante tuir Jezús ho gratuidade totál, la hein selu, haree nafatin nu'udar grasa Maromak nia don sira maski la so'i.

Parte daruak testu nian (vers. 41-45), hatudu eskolante sira-nia reasaun ba maun-alin na'in rua nia pretensaun no Jezús nia katekeze ida kona-ba servisu.

Sira-nia reasaun hrus nian hatusu katak sira mós iha pretensaun hanesan. Ba sira, Tiago no João nia hahusuk hatudu "jogada ida antisipasaun nian" nu'udar ameasa ba ambisaun sekreta ne'ebé sira rai subar iha fuan laran.

Jezús aproveita sirkunstánsia ne'e atu repete Ninia hanorin no afirma filafali lójika Reinu nian. Nia hahú hodi fó hanoin ba sira modelu "ukun-na'in sira nasaun nian" no boot sira mundu nian (vers. 42): sira afirma sira-nia autoridade absoluta, domina povu sira ho kbiit no hanehan sira, ezije onra, priviléjiu no título sira, sira promove an rasik hodi comunidade nia kustu, ezerse podér ho forma arbitrária... Eskema ida-ne'e labele sai modelu ba comunidade Reinu nian. Komunitade Reinu nian harii iha lei domin no servisu nia leten. Nia membru sira tenke sente sira-nia an nu'udar "atan" ba maun-alin sira, serví sira iha haraik-an no simplisidade, lahó pretensaun atu manda no domina. Maski sira ne'ebé hetan knaar atu prezide comunidade, tenke ezerse sira-nia autoridade ho espíritu loos servisu nian, sai atan ba ema hotu. Hodi halakon husi sira nia an ambisaun ba podér no domíniu, membru sira comunidade Reinu nian tenke fó sasin kona-ba mundu foun, ho apoiu husi valór foun sira; sira sei hanorin ba ema sira ne'ebé sira hasoru iha sira-nia moris atu sai ema ne'ebé loos duni livre no haksolok.

Nu'udar modelu ba atitude foun ne'e, Jezús propoin nia An rasik: Nia "Mane-Maksoin ne'ebé mai laós atu ema serví Nia maibé atu serví no saran moris atu so'i ema hotu" (vers. 45). Defaktu, ita bele komprende Jezús nia moris tomak ho xave domin no servisu nian. Husi momentu inkarnasaun nian, to'ó momentu ikus Ninia moris iha rai. Nia tau nia An atu serví Aman no halo nia moris don ida domin nian ba ema sira. Nia nunca husik atu projetu pesoál ambisaun nian, podér nian, domíniu nian babeur nia; maibé hakarak de'it entrega nia moris tomak ba ema nia servisu, atu sira bele hetan moris nakonu no loos.

Rezultadu husi Jezús nia saran-an maka umanidade nia maksoin, Ho nia moris nia hasai ita husi moris-atan nian, opresaun nian. Hodi fó moris (to'ó raan fakar) atu propoin mundu ida livre husi ambisaun, husi egoízmu, husi podér ne'ebé hahata ita, Jezús selu "presu" ba ita-nia libertasaun. Ho Nia no husi Nia, moris mai comunidade ida "atan sira-nian", sasin orden foun ida iha mundu, orden Reinu nian.